

Date – 16/09/2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

1. Chief Minister Pu Lalduhoma'n a sorkar flagship programme 'Bana Kaih' ruahmanna chu tun thla hian hawn hman an tum thu a sawi.
2. Mizorama Kohhran 8-te chuan thla thar October ni 27 khian Council of Churches in Mizoram (CCM) din an tum thu an puang.
3. Kawng chhiat vangin Tuialhthei phur Tanker-te kawng lakah an tangkhang nasa a, Aizawl leh hmun danga Filling Station-ah tuialhthei pek chhuah tur a tam tawh lo.

<><><>

### CM HANDHOLDING

Chief Minister Pu Lalduhoma'n a sorkar flagship programme 'Bana Kaih' ruahmanna chu tun thla hian hawn hman an tum thu leh chutah chuan Chief Minister Special Scheme a awm dawn thu a sawi.

Tourism department hnuaiia tour operator pakhat, Evergreen Tours & Travels leh Chungtlang Lo Zawh Organising Committee te buatsaih, Chungtlang Zau Lo zawh a hmanpuinaah he thu hi sawiin Chief Minister chuan, Chungtlang khua chu Thelret ching tam khua an ni a, kalphung thar mipui sawrkar hian rubber hi a ngaih pawimawh avangin Chief Minister Rubber Missions kalpui tan a ni, a ti a. An khuaah hian hmalakna tam tak an neih chhoh zel a rinawm thu a sawi.

Hand holding scheme-a Chief Minister Special Scheme hnuaiiah hmalakna tur azira Cheng Nuai 11 thleng dawn theihna tur awm thu sawiin, Cheng Nuai 50 thleng puk theihna Loan a awm dawn bawk a; chutah chuan guarantor-ah sawrkar a tang ang a, a thawk thate chu an loan laka a pung zawng zawng pawh sorkarin a tumsak bawk ang, a ti.

Pu Lalduhoma chuan hetiang hmalakna hi India rama kalpui thei awm chhun an ni dawn nia sawiin, mipui sawrkar an nih ang ngeiin tumah thlei bik nei lovin, a ti tak tak tur an nih phawt chuan Handholding Scheme hi an dil thei ang, a ti a. Mizoram hmasawna tura sawrkar ruahmanna sawiin mipuite taihmakna ram, hlawhtlin tuma bei tak tak tamna ram hi ram changkang leh hmasawn an ni zel a; chutiang mite chu a tahtawlin an banah kaiin an khaichhuak dawn tiin an hlawhtlin ngei a rin thu a sawi a. An sawi tawh thin angin thlai thar pali an thlante kha a rate an puan ang khan sawrkar chuan support price a pe dawn a. Tute'n emaw sawi pawr an lo tum a nih pawhin lo awih lo tur leh sawrkar chu a dinna ngaiah nghet takin a ding reng a ni tih hre turin a chah a ni.

Chungtlang khua hi Reiek khaaw thlanga awm a ni a. Chhungkaw 100 vel an cheng mek a. An khaw ram tlak lama Tut lui phaiah chhungkaw 80 velin Rubber kung 50,000 chuang an nei mek a, Mizorama Rubber Cluster lian ber niin an insawi. Chhungkaw 70 vel chuan an hnai tan tawh a ni.



#### CHURCH UNITY

Mizorama kohhran hrang hrang inpumkhatna atana hmalakna chuan a vawrtawp thleng mekin Kohhran 8-te chuan thla thar October ni 27 khian Council of Churches in Mizoram (CCM) din an tum thu an puang.

Zirtawpnia Mizoram Baptist Kohhran hmunpui, Lunglei Serkawna Kohhran hrang hrang aiawh mi 41 thukhawmte chuan October ni 26-ah rorel inkhawm kovin a tuk October ni 27 (Pathianni)-ah Aizawl Mission Veng Presbyterian Kohhran Biak-inah CCM din a nih tak thu puan ni se tiin thutlukna an siam a. Baptist Kohhran General Secretary leh CCM dinna atana Committee Secretary, Rev. R. Lalbiakliana chuan Kohhran inpumkhatna pawla executive committee member tur atana kohhran hrang hrangin an rawn thawkhawm chuh mi 50 an nih tawh thu leh, Kohhran hrang hrangin kum khat atana an thawh khawm sum ruahman lawk Cheng Nuai 27 a luh tawh thu a sawi a. CCM pisa atan hian Aizawl Mission Venga Synod Conference Centre chu hman a ni dawn a. Hnathawk tur lak chungchangte pawh Zirtawpni-ah chuan sawiho a ni.

Tuna Council of Churches in Mizorama tel tawhte chu Mizoram Presbyterian Kohhran, Mizoram Baptist Kohhran, Evangelical Church of Maraland (ECM), Lairam Isua Krista Baptist Kohhran (LIKBK), Evangelical Free Church of India (EFCI), Isua Krista Kohhran (IKK), Wesley Methodist Church Mizoram (WMCM) leh Independent Church of India (ICI) te an ni.



#### OIL SCARCITY

Kawng chhiat vangin Tuialhthei phur Tanker-te kawng lakah an tangkhang nasa a, Aizawl leh hmun danga Filling Station-ah tuialhthei pek chhuah tur a tam tawh lo.

All Mizoram Petroleum Dealers' Association (AMPEDA) hruaitute chuan tunah hian tuialhthei phur truck-te chu Kawnpui leh Khamrang inkar kawng chhiaah an tangkhang deuh vek niin an sawi a. Oil tanker pahnih/khat Aizawl thleng a awm leh zauh thin tih sawiin, hemi avang hian filling station tam zawkin petrol leh diesel hralh tur an nei mang tawh lo niin an sawi a; mipui mamawh phur lirthei tangkhang awm zel tur tiziaawm turin chak zawkin sorkarin hma a lak a tul hle nia an ngaih thu an sawi a ni. Filling station neitu pakhat chuan petrol leh diesel hi tun lai hian Numaligarh atangin an la ber thin niin a sawi a. Helamah hian kawng chhia awm ve tho mah se a zia-awm a, Kawnpui leh Khamrang inkar kawng chhe lutuk avangin tuialhthei phurtute an tangkhang nasa a ni, a ti a. An tuialhthei phurtu driver pakhat Inrinni a rawn dahtu phei chuan Mizoram an rawn luh atanga ni 8-naah Aizawl an rawn thleng thei chauh niin a sawi a ni. AMPEDA hruaitute chuan Mizoramin tuialhthei a harsatna a tawh fo thin tih zia-awm na'n a chhek khawlina tur (Oil Depot) Mizoram chungngei a din chu mipui mamawh a ni a

ti a. Kawng chhia emaw harsatna dang a awma, heng harsatna mipuiin an tawh fo thin tih ziaawm na'n thla khat daih tal tuialhthei dah khawlna Oil Depot a awm chuan he'ng harsatna hi sut kian theih a nih a beisei-awm a tih thu an sawi a ni.

Kawng chhe lutuk avanga Oil tanker te an tangkhan nasat avang hian Champhaia filling station te pawhin tuialhthei hralh tur an nei tlem tawh hle.



## MALARIA

Kumin thla 8 kal ta chhung khan Mizoramah sikserh natna avangin mi 5 an thi a, thite hi Lawngtlai district ami vek an ni.

Health and Family Welfare hotute hnen atanga thudawn danin kumin January atanga August thla tawp thleng khan sikserh veia rinhlelh mi nuai 2, sing 1, sang 5 leh 39 te thisen endik a ni a. Chuta tang chuan mi 14,634 te chu sikserh natna an kai tih hmuhchhuah a ni a. An zinga 5, Lawngtlai district ami vekin nunna an chan a ni. Sikserh vei hmuhchhuah zinga 7,858 hi PF an tih mai, Plasmodium Falciparum Parasite kai an ni a, chu chu sikserh hri kai zawng zawng atanga za zela 53.70 an ni a, mi 6,776-te chuan PV an tih mai, Plasmodium Vivax an kai thung a ni. Aizawl district-ah sikserh hri kai inringhlel thisen endik an tam ber a, mi 63,458 thisen endik a ni a, mahse sikserh natna vei hmuhchhuah chu mi 67 chauh an ni. Lawngtlai district chu sikserh vei leh vei lo thisen endik tamna ber dawttu a ni a, thisen 37,274 endik zinga 7,003 chuan sikserh an vei tih hmuhchhuah a ni a. Sikserh vei hmuhchhuah zinga a tam zawk, mi 4,165-te chuan PF an vei a ni.

Sikserh vei leh vei lo hriatna atana thisen endik tam ber pathumna chu Lunglei district a ni a, mi 33,056 thisen an endik zinga mi 3,188 chuan sikserh an vei tih hmuhchhuah niin an zinga 2,027 te chu PF vei an ni. Sikserh vei tamna thin tho Mamit district-ah chuan mi 18,692 thisen endik zinga 2,738-te chuan he hri hi an kai tih hmuhchhuah a ni a, Mamit-ah hian PF aini PV vei an tam zawk. Mizorama sikserh natna vei tamna district 3-te hi Bangladesh nena ramri intawm vek an ni. District lum berte zinga ngaih Kolasib-ah chuan sikserh vei leh vei lo thisen 12,027 endik a ni chungin a vei hmuhchhuah chu mi 13 chauh an ni a, an zinga pakhat chauhvin malaria PF a vei a ni.



## DRUGS SEIZURE

Zirtawp zan khan Keifang dawrkawnah Pu H. Laltanpuia SDPO Saitual leh a hote chuan motor zin veivak an endiknaah Champhai Sumo MZ 01-L-2167 a passenger pakhat, Ni Dun Lian, kum 41 Ngailan Khua, Myanmar nia inchhal hnen atangin heroin ni ngeia rinhlelh, gram 592.57 a rit, Cheng Nuai 17 Sing 7 leh Sang 6 man an man a. Saitual Police Station-ah thubuai ziah luh niin, dan anga hmalak a nih theih nan a neitua puh leh a kut atanga an mante hi Inrinni khan District Court Aizawlah thawn a ni.



## NATIONAL LOK ADALAT

Mizoram State Legal Services Authority chuan Inrinni khan an pisa-ah National Lok Adalat an buatsaih.

National Lok Adalat-ah hian pawisa puk chungchang te, loan ruh chungchang, ram buai chungchang, nupa inkar thubuai, chhungkaw buaina, ro inchuh leh harsatna chi hrang hrang ngaihtuah thin a ni a, thubuai ziah luh 3,081 awmin heng zinga eng emaw zat hi an chingfel a ni.

District hrang hranga District Legal Services Authority leh High Court Legal Services Committee, Gauhati High Court, leh Aizawl Bench-ah te pawh National Lok Adalat hi huaihawt a ni bawk.

Lok Adalat-ah hian court pangngaia thubuai neih aiin thubuai chinfel a awlsam zawk a, pawisa sen a ngai lova, ukil rawih a ngai lo bawk a, thubuai neitute'n an harsatnate Conciliator-te nen sawihoin a chinfel dan tur an ngaihtuahho thin a ni.

<><><>

#### RODENT ATTACK

Tun hnai khan Zawlnuam Borai khuaa chhungkaw pakhat thlawhhmaa buh vui, tin 2 leh a chanve hmun chu Sazuin zan khat thil thu-ah an eizo vek.

Zawlnuam Borai YMA Branch President Pu P.C. Lalhruaikima'n a sawi dan chuan Pu Vanlalngheta buh hmun bak hi hetiangazazu-in an khawih chhiat a la awm ngai lova. Pu Vanlalngheta te chhungkaw lo hi a bing a, an ri-ah lo nei dang an awm lova, Borai khua atanga km 6 vela hla a awm a ni. An thlawhhmaa velah sanghal no hruai an chhuak tih a hriat avangin September ni 10 khan Pu Vanlalngheta hian an buh vui zan lama veng turin a naute pathum a tir a. Lo vengtute hian nghal rual ni lovin buh khawihtu ri sung sung an hria a, eng nge a nih pawh thim-thamah an chian thei lova. A tuk lama a zuk endik chuan a buh hmun tin 2 leh a chanve vela zau chu sazu-in an seh zo vek tih a zu hmu ta niin Pu Vanlalngheta chuan a sawi a. Thil thleng hi Zawlnuam BDO hnenah an hriattir nghal thu a sawi a ni.

Tun hnai atang khan Raw-thing a tãm mek a, nakum khi Thingtam lo thlen leh hun tur niin helam zirmite chuan an sawi a. Thingtam hnuhnung ber chu kum 1977 kha a ni. Rawthing hi kum 48 dan zelah a tam thin a, mau leh rua a tam hian sazu a puang ziah niin upate chuan an sawi a. Sazu-in an thlawhhmaa buh leh bal an seh zawh avangin tam a tla ta thin a ni. Nakuma Thingtam lo thleng turah pawh a 'sehsam' an tiha thil thleng thin Thangnang kai chiam leh pangang puangte pawh hmun hrang hrangah a thleng tawh a ni.

<><><>

#### UNION EDUCATION MINISTER

Union Education Minister leh Haryana Election Incharge Dharmendra Pradhan chuan, Bharatiya Janata Party-in hmasawna hna a thawh danah mipuiin a vawi thumna atan BJP sorkar siam turin thutlukna an siam niin a sawi. Dharmendra Pradhan hian nimin Pathianni khan Karnal-ah thu la khawmtu-te a kawm a, a hmunah hian mipui an pungkawm nasa hle. Union Minister chuan tun hnai kum sawm chhungin BJP sorkarin loneitute, hmeichhiate, leh thalaite tan hna a thawh chu lawmawm a tih thu a sawi a. State sum leh pai lama hmasawna a ni emaw, state chhunga mi harsa zawkte tan pawh ni se, sorkarin kawng tinrengah hna ropui tak a thawk a ni, a ti. Pradhan chuan Haryana sorkar chuan state chhunga thlai tharchhuahte chu minimum support price (MSP) a pe a, eirukna awm lohna state a ni, a ti bawk. Thalaite chu pawisa awm lo leh diklohna awm lovin hna pek an nih thu a sawi.

**Ram pum leh bial hruaitute chuan assembly inthlanpui neih tura hmun hrang hrang tlawhkualna hun neiin, assembly bial 90 zawng zawng an tlawh vek dawn tih a sawi bawk.**

